



SAOPĆENJE ZA JAVNOST

6. april 2021.

JP PUTEVI BRČKO **Osuđeni članovi upravnog odbora**

Tužilaštvo Brčko distrikta BiH dokazalo je krivicu predsjednika i članova upravnog odbora JP Putevi Brčko za nesavjestan rad u službi u vezi s povećanjem ličnih primanja direktoru tog preduzeća. Pred Osnovnim sudom u Brčkom Almir Kukuljević, Marinko Viljušić i Slaviša Čortuma osuđeni su za krivično djelo nesavjesnog rada u službi. Oni su suprotno propisima usvojili odluku na osnovu koje je direktoru preduzeća M.M. omogućena isplata stimulativnog dijela plaće za 2017.godinu u iznosu većem od 15 000,00 KM.

Tužilaštvo Distrikta procesuiralo je Kukuljevića, Viljušića i Čortumu jer su u decembru 2016. godine, postupajući kao odgovorne osobe u Distriktu suprotno propisima usvojili prijedlog direktora za utvrđivanje stimulativnog dodatka na plaću. Nesavjesno postupivši u obavljanju dužnosti, oni su jednoglasno donijeli odluku na osnovu koje je direktoru preduzeća M.M., po tom osnovu u 2017. godini isplaćeno 15 547,22 KM, kao i 9 848,22 KM za doprinose iz tog dodatka, za koje je iznose oštećeno to javno preduzeće.

Kukuljević, kao predsjednik, a Viljušić i Čortuma, kao članovi upravnog odbora optuženi su za krivično djelo Nesavjestan rad u službi (*iz člana 381 stav 2 Krivičnog zakona Brčko distrikta BiH*) za koje su potom pravosnažno osuđeni na po trideset dana zatvora. S obzirom na to da su priznali izvršenje krivičnog djela, te da je šteta preduzeću u potpunosti namirena, sud je utvrdio da postoje uslovi za izricanje kazni zatvora ispod zakonskog minimuma.

